



Inatsisartuni ilaasortaq  
Hans Aronsen, Inuit Ataqtigiit  
/maani

23. december 2011

## Oquk aamma ineqarnermut akiliutinik iluarsinissaq

Sags nr. 2011-059170  
Dok.nr. 791793  
Postboks 909  
3900 Nuuk  
Tlf. (+299) 34 50 00  
Fax (+299) 34 54 10  
E-mail: aan@gh.gl  
www.nanoq.gl

Asasara Hans

Aallarniutigalugu apeqquteqarnerit pillugu qutsavigissavakkit, suliaq pillugu annertunerusumik nassuiaanissamut periarfissikkamma. Siullermik apeqqutitit issuarneqarput, tamatumalu kingorna akissutikka allanneqarlutik.

1. Matumuuna Naalakkersuisunut apeqquteqaatigissavara ineqarnermut akiliummik qaffaaniarneq tunuarterisaannginneraat?

AKISSUT: Naamik. Suli attartortunut ataasiakkaanut siumoortumik nalunaarutininik nassiussuisoqanngilaq. Maannarpiaq oqoqartoqarnera pissutigalugu ineqarnermut akiliutit qaffannissaannut siumoortumik nalunaarutininik nassiussueqqunagu A/S Inissiaatileqatigiiffik INI piumaffigineqarpoq. Ajornartorsiummut aaqiissutissatut siunnersuummik kingusinnerusukkut Naalakkersuisut saqqummiussisussaapput.

2. 2012-mi upernaakkut inatsisartut ataatsimiinnissaannut Naalakkersuisut nuna tamakkerlugu inissiat oqoqarsinnaanerit pillugu misissuinissamut pilersaarummik saqqummiussilersaarnersut apeqqutigissavara?

AKISSUT: Naamik. Inissiami oqoqartoq allanilluunniit attartortitsisup iluarsisassaanik peqartoq paasineqarpat, tamanna pillugu attartortitsisumut saqqummiussisalluni attartortoq pisussaavoq. Attartortoq oqoqarneranik pasitsaassaqaarsimappat, A/S Inissiaatileqatigiiffik INI ajornartorsiummik misissuilluni aallartissaaq, tamatumunngalu peqatigitillugu aaqiissutissamik siunnersuuteqassalluni.

Illassutigalugu oqaatigisinnaavaara, Namminersorlutik Oqartussat inissiaataanni attartortittakkani nuna tamakkerlugu aammalu tulleriaaraluni misissueqqissaartoqassappat, inissiat ataasiakkaat tamarmik misissorneqartariaqassammata, tamannalu ukioq ataaseq tikillugu sivissuseqarsinnaavoq. Oqoqarneranik paasisaqarnissap ajornanngitsuaraanera, kisiannili tamatumunnga pissutaasup paasinissaata ajornarnerunera tamatumunnga pissutaavoq. Taamaattumik oqoqarneranut attartortup pissusilersornera pisuunersoq imaluunniit inissiap sannaa pisuunersoq, taakkuluunniit akuleriillutik pisuunersut paasiniarlugu tulleriaaraluni nalunaarsuinissaq nakkutilliinissarluk pisariaqartussaavoq.

Namminersorlutik Oqartussat inissianik attartortittakkanik 6.500-t missaanniittunik pigisaqarnerat, aammalu inissiami ataatsimi inoqutigiit ukioq ataaseq tikillugu nakkutigineqarnissaasa 15.000 koruunit missaannik akeqartussaanera eqqarsaatigalugit, misissuinermut aningaasartuutit katillugit 100 mio. koruunit tikissinnaavaat, tamatumali peqatigisaanik oqoqarnernut pissutaasup iluarsinissaanut aningaasanik immikkoortitsisoqarsimanngilaq.

Taamaattumik misissuinissarpiaamut tamatumalu kingorna ajornartorsiut paasineqartoq aaqqinniarlugu iluarsaassinissamut aningaasanik immikkoortitsisoqarsimanngimmat, nuna tamakkerlugu misissuinermik aallartitsinissaq naapertuuttutut isumaqarfigineqanngilaq. Tamatuma saniatigut ajornartorsiutit tamatigut aaqqinneqarsinnaanissaat naatsorsuutigineqarsinnaanngilaq, illup sannaa tunngaviusumik kukkuneqarsinnaammat, taamatullu najugaqartut tamatigut pissusilersuutiminnik allanngortitsinissamut kajumissuseqarneq ajormata. Naalackersuisut ajornartorsiutinut paasineqareersunut aaqqiiniarnissamut aningaasanik immikkoortitsinissartik ornigineruaat.

Inussiarnersumik inuulluaqqusillunga

Jens B. Frederiksen